



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: VSTV BiH), u sastavu, tužilac Sanin Bogunić, predsjednik Vijeća, sudija Velimir Ninković, potpredsjednik Vijeća, sudija Izo Tankić, sutkinja Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, tužilac Saša Sarajlić, sutkinja Ljiljana Bošnjak - Glizijan, prof. dr. Džamna Vranić, advokat dr. sc Davor Martinović, tužiteljica Željka Fabić i advokatica Elma Veledar Arifagić, na sjednici održanoj 26. i 27.02.2025. godine, donijelo je

## **R J E Š E N J E** **o imenovanju sudije Suda Bosne i Hercegovine**

- I. Za sudiju Suda Bosne i Hercegovine imenuje se **Denis Kurtović**.
- II. Datum stupanja na dužnost imenovanog Vijeće će odrediti posebnom odlukom.

### **O b r a z l o ž e n j e**

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), VSTV BiH je dana 15.01.2024. godine, na internet stranici VSTV-a BiH objavilo javni konkurs pod brojem: 04-07-3-188-1/2024, kojim je oglašena 1 (jedna) pozicija sudije Suda Bosne i Hercegovine sa iskustvom na krivičnom referatu.

Nakon provedene konkursne procedure, VSTV BiH je donijelo rješenje, broj 04-07-3-3583-1/2024 od 26.09.2024. godine kojim je kandidata Denisa Kurtovića imenovalo na poziciju sudije Suda Bosne i Hercegovine, s tim da će se o datumu stupanja na dužnost imenovanog kandidata, odlučiti posebnom odlukom.

Protiv navedenog rješenja, kandidat Igor Todorović je blagovremeno podnio tužbu, kojom je osporio zakonitost provedenog postupka imenovanja, koji je prethodio donošenju osporenog akta tuženog.

Vijeće za upravne sporove Suda Bosne i Hercegovine donijelo je presudu, broj: S1 3 U 049611 24 U od 07.11.2024. godine kojim je tužba kandidata Igora Todorovića odbijena kao neosnovana.

Nezadovoljan donesenom presudom, kandidat Igor Todorović podnio je zahtjev za preispitivanje sudske odluke, u kojem je ponovio tužbene navode i osporio valjanost zaključka Vijeća za upravne sporove, smatrajući da isto Vijeće nije provelo, odnosno nije imalo uvid u sve akte spisa tuženog organa.

Apelaciono vijeće Suda Bosne i Hercegovine je postupajući po zahtjevu za preispitivanje sudske odluke donijelo presudu broj: S1 3 U 049611 25 Uvp od 10.01.2025. godine, kojom je zahtjev za preispitivanje sudske odluke uvažen, ukinuta presuda Vijeća za upravne sporove Suda Bosne i Hercegovine, broj: S1 3 U 049611 24 U od 07.11.2024. godine i predmet vraćen istom Vijeću na ponovni postupak.

Postupajući po zauzetom pravnom shvatanju i uputama Apelacionog vijeća Suda Bosne i Hercegovine, Vijeće za upravne sporove Suda Bosne i Hercegovine u ponovnom postupku donijelo je presudu, broj: S1 3 U 049611 24 U 2 od 31.01.2025. godine kojom je tužba kandidata Igora Todorovića uvažena, osporeno rješenje VSTV-a BiH, broj: 04-07-3-3538-1/2024 od 26.09.2024. godine poništeno i predmet vraćen tuženom na ponovno rješavanje, uz uputu da VSTV BiH u ponovnom postupku otkloni uočene nedostatke u odnosu na potencijalni i stvarni sukob interesa i nakon provedenog postupka donese pravilnu i zakonitu odluku.

Prije postupanja po presudi Vijeća za upravne sporove Suda Bosne i Hercegovine, broj: S1 3 U 049611 24 U 2 od 31.01.2025. godine, u skladu sa članom 10a. Zakona VSTV-u BiH i čl. 32s. i 32u. Poslovnika VSTV-a BiH, sutkinja Sanela Gorušanović - Butigan, potpredsjednica Vijeća izuzela se iz cjelokupnog postupka predlaganja i imenovanja za poziciju sudije Suda Bosne i Hercegovine.

VSTV BiH je na sjednici održanoj 05. i 07.02.2025. godine postupajući po presudi Vijeća za upravne sporove Suda Bosne i Hercegovine, broj: S1 3 U 049611 24 U 2 od 31.01.2025. godine, donijelo zaključak da se raspravljanje i odlučivanje o imenovanju na poziciju sudije Suda Bosne i Hercegovine u okviru javnog konkursa, broj: 04-07-3-188-1/2024 od 15.01.2024. godine, odlaže za narednu sjednicu VSTV-a BiH, nakon prethodnog razmatranja od strane Podvijeća Bosne i Hercegovine.

U skladu sa navedenim zaključkom VSTV-a BiH, nadležno Podvijeće Bosne i Hercegovine je dana 18.02.2025. godine održalo sastanak na kome je nakon sveobuhvatne rasprave, u okviru gore navedenog javnog konkursa, u skladu sa odredbama člana 43. st. (1) i (2) Zakona o VSTV-u BiH, a u vezi sa čl. 59a., 59b., 60. i 61. Poslovnika VSTV-a BiH, utvrdilo prijedlog imenovanja za jednu (1) poziciju suca Suda Bosne i Hercegovine sa iskustvom na krivičnom referatu.

U međuvremenu, kandidat Igor Todorović je dopisom od 24.02.2025. godine obavijestio VSTV BiH da nije odustao od kandidature za poziciju sudije Suda Bosne i Hercegovine, bez obzira što je u međuvremenu (16.01.2025. godine) imenovan na poziciju sudije Posebnog odjela Vrhovnog suda Federacije Bosne i Hercegovine za korupciju, organizovani kriminal i međukantonalni kriminal. Obzirom da je njegova kandidatura za poziciju sudije Suda Bosne i Hercegovine bila ranije, da je nakon objave rješenja VSTV-a BiH od 26.09.2024. godine u zakonskom roku pokrenuo postupak pred Sudom Bosne i Hercegovine, a da je za sudiju Posebnog odjela Vrhovnog suda Federacije Bosne i Hercegovine imenovan dok je postupak pred Sudom Bosne i Hercegovine bio u toku, činjenica njegovog imenovanja na poziciju sudije Posebnog odjela Vrhovnog suda Federacije Bosne i Hercegovine ne može biti razlog da ne bude imenovan za sudiju Suda Bosne i Hercegovine kao prvorangirani kandidat. Osnovanost svega naprijed navedenog nalazi u odredbi člana 44. stav (3) Zakona o VSTV-u BiH, u kojoj je jasno navedeno da, ako Vijeće (u konkretnom slučaju Sud Bosne i Hercegovine) poništi odluku o imenovanju, na tu dužnost će imenovati drugu osobu iz grupe prijavljenih kandidata ili će ponovo objaviti konkurs za to upražnjeno mjesto. Bez obzira da li je odluku o imenovanju poništio VSTV BiH ili Sud, posljedice poništenja odluke su iste.

Osvrćući se na navode dopisa kandidata Igora Todorovića, VSTV BiH je konstatovao da se primjena odredbe člana 44. stav (3) Zakona o VSTV-u BiH ne može dovesti u vezu sa postupanjem VSTV-a BiH po presudi Suda Bosne i Hercegovine, broj: S1 3 U 049611 24 U 2 od 31.01.2025. godine, kojom je tužba kandidata Igora Todorovića uvažena, osporeno rješenje VSTV-a BiH, broj: 04-07-3-3538-1/2024 od 26.09.2024. godine poništeno i predmet vraćen tuženom na ponovno rješavanje. Naime, odredbama člana 44. stav (2) i (3) Zakona o VSTV-u BiH propisano je da VSTV BiH može poništiti odluku o imenovanju ako nakon donošenja odluke o imenovanju, a prije nego što imenovani sudija ili tužilac preuzme dužnost, dobije podatke koji bi, da su bili poznati u vrijeme imenovanja, predstavljali razlog da VSTV BiH ne donese odluku o imenovanju, te da VSTV BiH može, ako to smatra neophodnim, odgoditi datum preuzimanja dužnosti sudije ili tužioca na koga se odnose navedeni podaci, kako bi te podatke moglo na odgovarajući način provjeriti. Ako VSTV BiH poništi odluku o imenovanju, na tu će dužnost imenovati drugu osobu iz grupe prijavljenih kandidata, ili će ponovno objaviti konkurs za to upražnjeno

mjesto. Dakle, ne stoje navodi kandidata Igora Todorovića o istim posljedicama poništenja odluke o imenovanju, bez obzira da li je odluku o imenovanju poništio VSTV BiH ili Sud Bosne i Hercegovine.

VSTV BiH je konstatovao da su kandidati sa rang liste pod rednim brojem 1 Igor Todorović i rednim brojem 3 Mersudin Pružan na sjednici održanoj 15. i 16.01.2025. godine imenovani na poziciju sudije u Poseban odjel Vrhovnog suda Federacije Bosne i Hercegovine za korupciju, organizirani i međukantonalni kriminal. Uvidom u službene evidencije Vijeća, te na osnovu dopisa Suda Bosne i Hercegovine, broj: SU: 03-1-25/25 od 13.02.2025. godine utvrđeno je da protiv rješenja o imenovanju navedenih kandidata za poziciju sudije Posebnog odjela Vrhovnog suda Federacije Bosne i Hercegovine pred Sudom Bosne i Hercegovine nije pokrenut upravni spor, čime su navedena rješenja o imenovanju postala pravosnažna.

Prilikom predlaganja i imenovanja kandidata za 1 (jednu) poziciju sudije Suda Bosne i Hercegovine, Vijeće je imalo u vidu odredbe člana 49. stav (9) Poslovnika VSTV-a BiH koje propisuju da kandidat koji se prijavio na oglašene pozicije u okviru jednog ili više javnih konkursa koji nisu okončani, a u međuvremenu je imenovan na poziciju nosioca pravosudne funkcije, neće učestvovati u daljoj konkursnoj proceduri po navedenim konkursima.

Obzirom da su kandidati sa rang liste pod rednim brojem 1 Igor Todorović i pod rednim brojem 3 Mersudin Pružan, u međuvremenu imenovani na poziciju sudije u Poseban odjel Vrhovnog suda Federacije BiH za korupciju, organizirani kriminal i međukantonalni kriminal, zaključeno je da navedeni kandidati u skladu sa članom 49. stav (9) Poslovnika VSTV-a BiH neće učestvovati u daljoj konkursnoj proceduri za poziciju sudije Suda Bosne i Hercegovine.

Nakon sveobuhvatne rasprave, razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovníkom VSTV-a BiH, Vijeće je na osnovu člana 59b. st. (4) i (5) Poslovnika VSTV-a BiH, a u vezi sa kriterijima iz člana 43. Zakona o VSTV-u BiH odlučilo da za oglašenu poziciju sudije Suda Bosne i Hercegovine sa rang liste imenuje kandidata Denisa Kurtovića iz reda bošnjačkog naroda.

Imenovani kandidat je sudija Općinskog suda u Sarajevu od 2009. godine, s tim da je u periodu od 2009. g. do 2016. g. obavljao dužnost dodatnog sudije nakon čega je imenovan za redovnog sudiju tog suda. U periodu od 2009. g. do 2016. g. obavljao je sudijsku dužnost na privrednom referatu, a od 2016. g. do danas na krivičnom referatu. Ujedno je predsjednik krivičnog odjeljenja i zamjenik predsjednika suda. Prije imenovanja na poziciju sudije, u razdoblju od 2005. g. do 2009. g. obavljao je poslove stručnog saradnika u Općinskom sudu u Sarajevu, a u periodu od 2003. g. do 2005. g. poslove advokatskog pripravnika.

Vijeće je nakon ocjene stručne sposobnosti kandidata zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 14,8 bodova od mogućih 20 bodova, čime je u konačnici ostvario 114,8 bodova od mogućih 120 bodova.

Kriteriji stručnosti i sposobnosti pravne analize imenovanog kandidata, koji već obavlja dužnost sudije, utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijava po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 5, 5 i 5, utvrđeno je da je kandidat za navedene tri godine za koje je ocijenjen ostvario prosjek od 5. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 14,8 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (1) tačka c) i 59b. st. (2) i (4) Poslovnika VSTV-a BiH stekao uslove za predlaganje i imenovanje na poziciju sudije Suda Bosne i Hercegovine, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedenog kandidata ocijenilo da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine. Nacionalna struktura 56 sudija, prema popisu stanovništva iz 1991. godine, bi trebala biti: Bošnjaci (24,3), Hrvati (9,7), Srbi (17,5), Ostali (4,4). Trenutna nacionalna struktura 43 sudija je: Bošnjaci (19), Hrvati (7), Srbi (14), Ostali (3). Prema prethodno navedenoj nacionalnoj strukturi u Sudu Bosne i Hercegovine nedostaje kandidata iz reda bošnjačkog naroda (- 5,3), hrvatskog naroda (- 2,7), srpskog naroda (- 3,5) i ostalih (- 1,4).

Obzirom da je značajno veći broj pozicija koje je potrebno popuniti kandidatima iz reda bošnjačkog naroda, Vijeće je u konkretnom slučaju za poziciju sudije navedenog suda imenovalo kandidata koji dolazi iz reda bošnjačkog naroda.

Imajući u vidu potrebu navedenog suda za sudijom sa specifičnim radnim iskustvom, koja je utvrđena u skladu sa članom 34. stav (1) tačka g) Poslovnika VSTV-a BiH, Vijeće je vodilo računa i o radnom iskustvu kandidata u određenoj oblasti prava, te je cijeniло da imenovani kandidat obavljajući dužnost sudije u Općinskom sudu u Sarajevu na krivičnom referatu posjeduje traženo iskustvo na krivičnom referatu. Okolnosti koje se tiču radnog iskustva imenovanog kandidata utvrđene su na osnovu informacija pribavljenih na razgovoru sa kandidatom, u skladu sa članom 53. stav (11) Poslovnika, te uvidom u službene evidencije Vijeća.

Uzimajući u obzir navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i d) Poslovnika VSTV-a BiH, ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan za sudiju Suda Bosne i Hercegovine.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju novoimenovanog sudije, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će

izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

**Pouka o pravnom lijeku:** Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1038-2/2025

Datum: 27.02.2025. godine



